



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 3

**Netanyahu-i Gaza yimjung
raksatsütsü inyaker: Hamas**

**Delhi nung opposition
lenir Atishi shimogo**



VOL. XXII ISSUE NO. 131 (ADOK 131)

DIMAPUR

TENTONÜ

(MONDAY)

TSÜKLAI

(FEBRUARY) 24, 2025

₹ 5.00

Manipur national highways atema temulung agütsür

Imphal, February 23, 2025

(Agencies): Manipur nung President's Rule kübok sorkari national highway ajak nung timtem kecha melii senzüsenbongtsü temulung agütsür ta Manipur Chief Secretary Prashant Kumar Singh-i ashi.

"NH-102 (Imphal nungi Dimapur, Nagaland) aser NH-37 (Imphal nungi Silchar, Assam) nung security maparen renemdar aser passenger garitem tiptema senzütetstü,. Tongtipang tesemtem nung security maparen talila inyaksü" ta Prashant Kumar Singh-i ashi.

May 3, 2023 nü Manipur nung kin o kin tsüngda mepetmesü adokba sülen item highway nung Meitei nunger senzüsenbongba nung timtem ajurua arur.

Sorkari kin o kin balala tsünga temulung lemteped aser

passenger garitemi tiptema senzütsü atema mapa inyakdar ta CS Singh-isa ashi.

Item highway nung anogoshia khu abenba gari 500 shi tiptema senzür. Tongtipang tesemtem nung security protocols benshir aser security convoys lemjüja lir ta paisa ashi.

Manipur kübok district balala nung checkpoints 110 tashi lapoka lir ta paisa shisem.

Indian security forces-i Manipur police den külemi Irilbung police station anasa Naga yim ka nung prangpong-injang aika ngutetogo.

Imphal East district kübok Phunal Maring Naga yimtsüng nung prangpong abenertem senzüba osang angashiba sülen Assam Rifles aser Manipur police-i joint operation ka tenzüka liasü.

Iba mapang parnoki prangpong-injang aika angu saka nisungbo shinga pua marutet.

NDA sorkari Northeast asoshi temulung agütsür: Union MoS Shobha Karandlaje

Aizawl, February 23, 2025

(Agencies): India ya alima nung economy tulutiba rongnung pungububa aser tekaratiba ainba linük ka lir ta Union Minister of State for Labour and Employment Shobha Karandlaje-i ashi.

"Tesüiba küm 10 tashi Modi'er sorkar ketdangstübaren ajungba agi linük rongsenketzüng kanga kara ainer" ta Karandlaje-i Aizawl nung osangbener den jembidang ashi.

Centre sorkari ochimashiba ken o kecha mali aser tang tashi nung Modi'er sorkar ya ochishia inyakba sorkar lir ta laisa ashi.

Centre sorkari welfare schemes balala tenzüka ajanga India nung alirtem tashi itdaksüogo. Modi'er sorkari infrastructure renloksüba nung temulung agütsür ta Union MoS Karandlaje-i ashi.

Centre nung tesüiba sorkartemi Northeast senzüka yutsü ajisüaka Prime Minister Narendra Modi-i aniba NDA sorkaribo iba tesem nung temulung agütsür. Tesüiba sorkartemi Northeast states nem senotsü ajema lemjükja aru, ta laisa metetdaksü.

"Tesüiba nung Northeast ya senotsütsü tsütsü sensaker liasü kechiyong tesüiba Centre sorkartemi iba tesem asoshi temulung magütsü" ta laisa ashi.

"2004 nungi 2014 tashi Congress-i aniba UPA sorkari Mizoram nem tax devolution Rs.

4,734 crore dang agütsü. Iba ya Modi'er sorkari tesüiba küm 10 tsüngda agütsüba den medemdangra kangasa ajema liasü" ta Shobha Karandlaje-i ashi.

2014 nungi 2024 tashi Modi'er sorkari Mizoram nem tax devolution Rs. 33,178 crore agütsüogo aser iba ya UPA mapang dang nungi 600% agi teimba agütsüba lir ta laisa ashi.

NDA sorkari Northeast atema temulung agütsür aser infrastructure renloksü meranger. Tangbo Northeast nung yimti aika NDA sorkar kübok national highways, railways, aser airports agi sendaktepa lir ta MoS-isa ashi.

Karandlaje-isa Micro, Small, and Medium Enterprises (MSME) portfolio bona lir aser lai ashiba agi Centre-i agriculture, horticulture, MSMEs, & skill development nung temulung agütsür.

Modi'er sorkari wadang balala nung lanurtem anitetsü atema skill development department balaka tentetogo ta laisa ashi.

Northeast states nung organic farming asür aser iba atema organic agricultural production atema temulung agütsür, ta lai ashi.

Northeast state tem nung ketdangsürtemi Central funds aser schemes nung temulung agütsütsüla aser nübortem dang Central schemes balala indang osang metetdaksütsüla ta Karandlaje-is ayongzük.

Nagaland sorkari Foothill Road agreement atema jangjashitsür

Dimapur, February 23, 2025

(TYO): Nagaland sorkari Foothill Road atema temulung agüja arur aser kümtem süia arudang iba lenmang atema senotsü aika lemjüksüogo ta Department of Works & Housing-i metetdaksü.

2013-14 nung -Rs. 40 crore, 2014-15 nung Rs. 27 crore, 2021-22 nung Rs. 30 crore aser 2023-24 (additional under SASCI) nung Rs 148.50 crore lemjüksüogo ta Commissioner & Secretary to Govt. of Nagaland Kesonyu Yhome, IAS-i sangdong ka nung ashi.

Item senotsü ajanga mapatong kübok tongti mapa kar inyakogo aser iba nung Liphayan nung River Doyang temdangba apu, formation cutting, culverts & CD structures yangluba aser tesem kar nung metaling mapa inyakogo ta pai ashi.

State sorkari iba mapatong atema Central funding bushia arur aser 2013-14 nungi aiben mapa inyakogo. Ministry of Road Transport and Highways (MoRTH) dang ashiba sülen Feasibility Study aser DPR agütsütsü temelaba agütsü. Parnokisa "C.E. Testing Company" shimtet, 2019 nung National Highway ka ama alignment asütsü aser 2022-23 nung NHIDCL-i mapa inyaksü tebilembatem lemsatepogo. Sorkarisa PM Gati Shakti kübok Prime Minister's Economic Advisory Council dangi tebilemba benogo ta Kesonyu Yhome-i ashi.

Kin hohotem aser Nagaland Foothill Road Coordination Committee (NFHRCC)-i iba mapatong atema kanga meranga

inyaka aruba atema sorkari pelar aser tenüngsang agütsür. Ajisüaka state sorkari rongshiaka Centre-i iba mapatong atema senotsü kecha magütsüba ajanga tetsükdaksü ajurua lir. Talisa iba lenmang ya Assam anasa asüba agi parnoki aiben tebilemtsü lemsatepogo, ta paisa ashi.

State sorkari Assam sorkar den jembitepa aruba agi tesentaktep tajungba kümogo aser tangbo mapa tenzüka inyaksüsa tensa ka ajurua lir. July 2024 nung state sorkari mapatong yaritsü nangzükba ama SASCI 2023-24 (Additional) kübok Rs. 148.50 crore lemjüksüogo. Iba ya Dimapur nungi Merapani, Rengmapani village, Tuli Division aser Mon Division stretch yanglutsü aser ano Peren district nunga apu ka yanglutsü atema agütsüba lir. December 2024 nung 2 lane yanglutsü atema contractor tem nem work orders agütsüogo ta Yhome-isa ashi.

Sorkari mapang shitak nung Foothill Road renemtsü atema tenangzükba agia inyaker. Iba mapatong ya 100% Government-funded lir aser nungdakba teinyaksü ajak lateta lir PWD (R&B) Department o contractor tem tsüngda Contract Agreement nung itemji jangjajangia shia lir. Anungji contractor temi NFHRCC dena third parties den agreements talila agitsü nungdak madoker ta paisa ashi.

Contractor temi aibelena mesüra metokmeperi inyakra sorkari Contract Agreements nung ajemdaker merenshitsü. NFHRCC-i mapa tajung inyaksü aser mapang shitak nung tembangtsü tangatetba nung

noktakba sorkari akhümtsübur saka sorkari senotsü ajunga agüja inyakba mapatongtem nung third-party agreements alitsü nungdak madoker aser telok shingaia sorkar nem tetuyuba magütsütsüla ta Yhome-isa ashi.

State sorkar ket nung senotsü peria maliba agi State PWD Department-i inyakba mapatongtem nung ali melen temenok magütsür. Centre sorkari senotsü agütsüba National Highway Projects dak alaka temenok magütsür. State sorkari teloktem aser sensotem dang ibala lenmang mapatongtem atema Right of Way (RoW) atema ali tenlatsü dang mepishi arur aser Foothill Road mapatong nunga kasa tangatetba nung dang inyaka aotsü asüngdangar ta paisa metetdaksü.

State sorkari contractor tem dang mapa tenzütsü shiyonga arur aser Department-i mapa anendaka ayuba züluoka ayutsü. PWD (Roads & Bridges) Minister lenisüba kübok sorkari iba mapatong nung yaritepa arur aser Minister-i NFHRCC aser bangdak kin hohotem den senden aiben menogo. Department-i olemteptsü mulunga dang lir aser iba mapatong tiptema inyaka aotsü atema tebilembatem angatsü, ta Yhome-isa ashi.

Iba mapatong mapang shitak nung renemtsü atema kin balala, NFHRCC, aser contractors temi amalitepa yariteptsü ayongzük. Tzüngluruwa tonga arur anungji maparen tangsa tenzüka inyaksüla aser sorkari iba mapatong ya Nagaland nung alirtem ajangzüksüsa inyaksü nangzük, ta paisa ashi.

FKJGP-i Jaintia Hills nung railway project magizüker

Guwahati, February 23, 2025

(Agencies): Meghalaya kübok West Jaintia Hills nung Federation of Khasi Jaintia and Garo People (FKJGP)-i maneni railway project anema noktaker.

FKJGP-i Centre sorkar dang Jaintia Hills nung lisopurtem kümzüka ayutsü ozüng tesashi meyanglui railway line meyanglutsü metetdaksüogo.

FKJGP-isa Jaintia Hills Autonomous District Council (JHADC) dang Northeast Frontier Railway (NFR) nem iba mapatong atema No Objection Certificate (NOC) magütsütsü mepishia metetdaksüogo.

NFR-i Assam nung Chaparmukh Junction nungi Meghalaya nung Jowai tashi 180-

kilometre broad gauge railway line yanglutsü shidanga lir.

Iba mapatong ya inter-state connectivity aser transportation infrastructure ajungkettsü atema tenzük. Ajisüaka, Meghalaya nung telok aikati iba mapatong anema noktaker aser iba ya parnoki ozüng alema nisungtem arutsü tsübuba atema lir.

Delhi-i aruba American Airlines tayimtsü ka Rome nung anendaksü

New Delhi, February 23, 2025

(Agencies): Deobarnü New York nungi New Delhi tashi American Airlines tayimtsü ka amokmerenba agi Rome-i ao.

February 22 nü John F Kennedy International Airport nungi Boeing 787 Dreamliner-i ketdangsüba Flight AA292 apusoa liasü. Iba tayimtsü ya Caspian Sea ajanga aodang email ka ajanga

bomb lir ta amokmerenba sülen Europe leni meyipa ao ta ketdangsürtemi ashi.

Iba osang anguba sülen ketdangsürtemi tayimtsü jungjunga reprangtsü atema Rome nung anenzüksü tetuyuba agüja liasü. Rome nung security officials nungi temelaba anguba sülen ang iba tayimtsü Delhi-i yoktsü.

American Airlines-ia sangdong ka nung "New York nungi Delhi tashi senzüba AA292 nung security lendong ka aliba agi Rome-i yokogo" ta metetdaksüogo.

American Airlines-i Rome nung ketdangsürtem den amalitepa mapa asadangdar aser passengers o crew dak timtem kecha mali ta ketdangsürtemi ashi.

Chuchuyimpang yimtak angati temang repranga angati mozü agütsü



Chuchuyimpang yimtak Free medical akanü Doctor,nurse,achayangertem aser Putu yimsüsürtem külemi tangokba noksa.

Mokokchung, Tsüklai / February 23 (TYO): Chuchuyimpang yimtak Tsüklai 22 nü "Sui-Ka- Pha Multispeciality Hospital Sivasagar Assam nungi Doctor-3 Nurse-2 ta atuagi Free Medical Camp ka

kaogo.Parnoki angati temang tendang aser angati mozü agüja teintet rogo dena ajak agi nisung 94 tashi temang reprangogo. Iba Free Medical Camp ya Wb.Tensasanger Supong Asso.Pastor Youth aser Sb.Takamar tenati achayanga

tena ketdangsüba nung agi liasü. Rionsanger Putu Tatar Menden Chuchuyimpang ajanga Doctor, Nurse aser ketdangsertem ajak dang nübur nüngtak reprangteta mapa tajung inyakba asoshi tepelaba metetdaksü.

Kohima Longmisa Senso Telongjem Hon Jubilee mungogo

Dimapur, Tsüklai/February 23 (TYO): Kohima Longmisa Senso Telongjem (KLST) Hon Jubilee benjongmung Molu Ki, Kohima nung "Senso Tsungsu Medem" omen nung ajemdaker February 22, 2025 nü munga liasü.

Iba sentong nung tongti o jembir Additional Director, Food & Civil Supplies, Lanutoshi Jamir-i iba benjongmung omen tetetzü ya nisung telok ka lungjemer angatetepa arok nükjidong asoshi inyakba dang ajar ta ashi.

Pai ashiba agi, Longmisa yimtsüng ya 1509 küm kumtet aser 1509 nungi 1964 tsüngta ya Longmisa yimkong asoshi Golden Age lir.

Iba mapang yimdaklir temi meranga inyaka yimtsüng asoshi tenüng tajung bener arua kidanger yimtsüngtem den tsükchitep aliba anena tesendaktep bener aru, ta ashi.

Pai ano yimdaklir tsüngta tesendaktep tajung aliba, kati ka den yaritepba indang bener arua jembia aser iba mapang putu yimsüsür temi ochi nung yimsü asü ta ashi.

Ajisüaka Longmisa yimtsüng nung 1964 nungi 2025 tsüngta yimten yimsüsür, sorkar mapa



Lanutoshi Jamir

nung ketdangsür aser entrepreneurs tajung madok, ta ashi aser yimtsür-yimer dang kanga aroka shisadangatsü ayongzük aser nüburtem tsüngta teamwork maliba ajiteter ta ashi.

KLST Hon Jubilee amungba tenüngsang agüja jembidang pai lokti dang Longmisa yimtsüng melenshitsü asoshi anir inyaksü ayongzüka liasü.

Paisa Hon Jubilee indang nünguo kakat sayaja liasü.

Kohima Longmisa Senso Telongjem tenzüker rongnung takum alir TT. Imdaksashi-i iba sentong nung jembidang 1975 küm nisung ishikati iba telongjem tentetba bilemteta aser timtem

jenti ajangshiba aser koda masüba mapang kati ka yaritepba indang lemsatepa liasü.

Tanübo KLST nung gazette officers, sorkar mapa inyaker jenti moaja lir, anungji Union-i Tsüngrem tenüng asangtsüla aser tarutsü asoshi mangdang tajung yur külemi inyaksüla, ta ayongzük.

Longmisa Village Council chairman, Merensosang Jamir-i tajungshi o tatsüka jembidang, kati ka tashi maitba tai putepa mekazüi kati ka ajungshitepa aser ajungkettsü merangtsüla, ta ashi.

Paisa pei tetsü oshi wazüka ayutsü nüngdakba lemsatepa liasü.

Iba sentong nung Longmisa Senso Telongjem Mokokchung tir Moasashi Jamir aser Longmisa Senso Telongjem Dimapur tir C. Pangertemjen natia o tatsütsü jembia liasü.

Sentong nung adenertem pela agizükba o KLST tir Arentemjen-i jembia aser Toshimeba-i melepzüng o jembia liasü.

Maneni Kohima Longmisatsür Telongjem-i Jubilee ken aten aser Er. K. Wati ajanga Hon Jubilee Pangzüng zünga liasü.

LC College of Engineering indang Nagaland Alumni sentong agi



Nagaland Alumni of LD College of Engineering, Gujarat züngsemtem Hotel Vivor, Kohima nung 6th Biennial Alumni meet alidang tangokba noksa nung angur.

Dimapur, Tsüklai/February 23 (TYO): LD College of Engineering (Ahmedabad, Gujarat) nung Nagaland Alumni pur 6th Biennial Alumni Meet sentong ka takok ngua February 22, 2025 nü Hotel Vivor, Banquet Hall, Kohima nung ayongzüka züngsemtem tali sendaktepa

tashi itshia liasü.

Iba sentong nung alakteta jaoker aser alumni züngsem Er. E. Mhonbemo Patton, Principal Secretary, PHED & Environment, Forest & Climate Change, Government of Nagaland ajanga tayongzükba o jembia liasü.

Pai college azüngba mapang

bilemteta aser menungraseta jembia aser telongjem nung alitsü aser nübur asoshi inyaksü tongtipang ta ashi.

Iba association nung züngsem 194 lir.

Parnoki tarutsü nung nübur asoshi mapa tajung inyaksü pangjemtepa iba sentong tembanga liasü.

Angh-i Sekrenyi benjong salem lemsatep

Dimapur, Tsüklai/February 23 (TYO): Sekrenyi benjong nung Angami nunger adianu aser adianutsür tem dangi salem abener, ta Nagaland Angh La Ganesan-i sangdong ka ajanga ashi.

Iba temeshi benjongmung ya asen sobaliba tajung den taktepa lir aser ibai tasen kumshiba, asüngtetshiba aser telongjem aser kinship jangjashiba mapang ka lir. Iba benjongmung ajanga

Angami kin telongzük nung kisüng masü saka sobaliba balala aser asen tasoli nung alirtem tsüngta temeim nung tesendaktep tali akangshitsü imlaa atar.

Iba benjong ajanga nenok mulungjang tali süngzüksü, telongjem asoshi tali ajungmesotsü aser tarutsü tia tesunep aser yimchiyimjung agi süngdakjang ta moatsür, ta Nagaland Angh-isa ashi.

Yingli College nung HIV & AIDS awareness sentong agi



Dimapur, Tsüklai/February 23 (TYO): Yingli College Longleng, Red Ribbon Club ajanga February 21, 2025 nü "Take the right path: my health, my right" omen nung ajemdaker HIV & AIDS indang awareness sentong ka ayongzüka liasü.

Iba sentong nung kaketshir aser tesayur ajak senteper nisung 224 dena liasü.


Shisalen sayur M. Lithei

Phom, staff NSAC ajanga shisa tajung lemsatep aser nüburtem anema alitsü asoshi inyaksü ayongzük.

Vice Principal Yingli College Dr. B Henshet Phom-i pela agizükba o jembia aser Assistant Professors, Konchem aser Manngai Phom menden liasü.

Assistant Professor, Lochumbeni Shitiri ajanga melepzüng o jembia sentong tembang.

February 25 nungi 'Terra Verde' art exhibition tenzüksü



Kohima, Tsüklai/February 23 (TYO): 'Local Colors' ajanga Task Force for Music & Arts (TaFMA), Government of Nagaland den lungjemer 'Terra Verde' sentong ayongzüksü, koba art exhibition ka lir aser yangji alima tebour ajung benjongtsü.

Kanga yongya aliba exhibition ya Centre of Excellence for Music and Arts (CEMA), Minister's Hill, Kohima nung February 25-28, 2025 anogotem alitsü.

'Terra Verde' ya English oshi nung "Green Earth" ta meyipzüker aser ibai alima nem akhum agütsüba lir, kong alima tebour ajung indang noksa tem yanglutsü.

Paintings, mixed media aser visual installations ajanga iba exhibition nung art aser alimar yimya tesendaktep sayutsü.

Local Colors yagi artistry temaba jenjangi ajungketer aser parnoki artist tem libajen tebour ajungba aser wazüka ayutsü pei tangatetba lemsateptsü asoshi sapang agütsütsü nükjidong nung iba sentong ya ayongzüker.

Ano TaFMA-i yariba ajanga iba sentong tali tashi itshia state nung art aser sobaliba tali indaksür.

Iba exhibition ya nisung ajak asoshi lir, kong art jangrartem, nature lovers aser nüburtemi asen lima tebour ajung yimya balala nung rasaa sayuba angutsü. Iba den külemi artwork tem talitsüa angutsü.

Iba sentong akhumdong ama Anthony Ngullie, Secretary, Youth Resources & Sports Department ajanga sentong tenzüksütsü. Iba exhibition ya anepdang 11:00 ako nungi nikongdang 4:00 ako tashi alitsü.

Delhi nung opposition lenir Atishi shimogo

New Delhi, February 23 (Agencies): AAP-i Delhi assembly nung opposition lenir menden atema taoba mapang Delhi Chief Minister aser Kalkaji nungi AAP MLA, Atishi shimogo; Delhi nung tetsürtem nungi opposition lenir mezügbubaji Atishi asütsü.

Osangbenertem senden ka nung jembidang AAP lenir Gopal Rai-i, Amongnü legislative senden amenba mapang nung Atishi lenir shimogo, ta metetdaksü.

"Ajaki melunga Atishi legislative party lenir shimogo. Opposition shilem agütsü atema nüburtemi AAP shim. Delhi Assembly nung Atishi Opposition lenir asütsü. Election mapang nangzükba ama BJP nem inyakdaksütsü atema AAP-i inyaksü. Ozü party-i yimsüsüba mapang inyakba mapa tajung maneni inyakdaksütsü atema onoki Atishi nem khuret agütsür," ta pai metetdaksü.

Gopal Rai-isa, "AAP MLA

tem legislative party senden ayongzük. Legislative party lenir shimogo. Sandeep Pathak observer shim. Pa meli election inyakyim tembang," ta ashi.

Tesülen Atishi-i, "Ni Legislative lenir shimba atema ni AAP national convenor Arvind Kejriwal dang pelar. Nüburtemi onok nem opposition mapa lezmüksüogo, anungji AAP-i tashitait opposition ji komaar sayutsü," ta metetdaksü.

Atishi ya Delhi nung tetsür chief minister tem rongnung tasembuba liasü aser Delhi assembly nung tetsürtem nungi mezügbuba opposition lenirji la kümogo.

Delhi Assembly senden Hombarnü tenzüksü aser anogo asemnü amentsü. Iba mapang nung BJP sorkari AAP anema CAG reports benoktsü.

Küm 27 sülen tang Delhi nung BJP sorkar aruogo. Tawa election nung BJP-i menden 48 nung takok ngua AAP sorkar astüngdoka liasü.

Bihar nung kinüngtsütem kümzüksü atema Protection Officer 140 shimtsü

Patna, February 23 (Agencies): Bihar state tesem ajaklen kidang-kibongtem nung kinüngburtemi azükba tetsürtem kümzüksü atema Bihar sorkari 'protection officers' 140 shimtsü atema telemtetba agiogo.

Social Welfare Department-i iba atemaji nübo tasen anitetsü aser sub-division, district aser state-level nung protection officers shimtsü.

Bihar nung kinüngburtemi kinüngtsütem dak azükba kanga bulua akümbe mapang ka nung sorkari iba telemtetba ya agiogo.

Osangbener den jembidang Social Welfare Department nung additional chief secretary aser Bihar Women & Child Development Corporation

nunga Chairman, Harjot Kaur Bamhrah-i, "Kidang kinüngtsütem dak azükba tebilemsü onük bentetsü atema department-i Protection Officers toklang shimtsü asoshi telemtetba agiogo. Iba maparen tekeraba nung tenzüksü. State tesem ajaklen Protection Officers 140 dak tali shimtsü. Sub-division level nung 101, district level nung 38 aser state-level nung PO ka shimtsü," ta metetdaksü.

Protection of Women from Domestic Violence Act, 2005 nung aliba ozüngtem nung ajemdaker iba telemtetba ya agiogo, ta lai metetdaksü.

"Iba ya talisa linük temzüng nung aliba ama tetsürtem temeden kümzüksü atema lir.

New Delhi, Tsüklai/February 23 (Agencies): Aluyimertemi agütsüba takhangba onüktem atema Centre aser aluyimer lenirtem senden amen, ajisüaka senden nung telemtetba kecha magitet; maneni March 19 nü Chandigarh nung senden amentsü.

Union Agriculture Minister Shivraj Singh Chouhan leniba

nung züngsem aseme akümbe Central team-i aluyimertem den senden amen.

Chouhan-i, senden kanga junga menogo, ajisüaka Minimum Support Price (MSP) guarantee dak sendakba nung telemtetba magitet, ta metetdaksü.

Chandigarh nung aliba Mahatma Gandhi Institute of Public Administration nung ghonda asem jungnüa senden amenba mapang nung central team-i aluyimertem dang MSP dak sendakba takhangba tejangja asüngdanga liasü.

Aluyimertemi, alu nungi züsentetba chiyungtsü tapu balala atema MSP guarantee ka nüngdaker, aser ibaji ajanga küm shia sorkar senpong nungi sen crore 25,000 nungi crore 30,000 tashi indoktsü, ta metetdakja liasü.

Senden nungji Punjab Finance Minister Harpal Singh Cheema-a densema liasü.

Osangbenertem den jembidang Cheema-i, "Aluyimertemi open market aser MSP levels nung aonsotsü market dak sendakba osang

tejangja metetdakja liasü. Ajisüaka iba osang nungji tangatetba balala liasü. Central team-i iba dak sendakba osang ano tejangjaba agüjang ta shiogo. Ajioda taruba anogo ishika tsüngda aluyimertemi osang tejangja agütsütsü melungogo," ta metetdaksü.

Aluyimer lenirtem- Jagjit Singh Dallewal aser Sarwan Singh Pandher nati, MSP guarantee ajanga aluyimertem timtem pungbatsü, ta ashi.

Kasa senden nungji central team-i Bhavantar Yojana densema sorkar schemes balala metetdaksüba den külemi aluyimba atema lezmüksüba budget osang metetdaksü.

Yaküm February 13 nungi tenzüka aluyimertem Shambhu aser Khanauri border points nung adenshir MSP atema takhangba agüja longkak aiter.

Aluyimertemisa loan sentsüh atoktsü, aluyimertem aser alu nung aayangertem nem pension agütsütsü aser 2021 küm Uttar Pradesh kübok Lakhimpur Kheri nung asüba aluyimertem nem ochi temeden agüjang, ta akhanger.

AAP-i senpong azüngtetogo saka tetsür nem teyari agütsütsü: Rekha

New Delhi, February 23 (Agencies): Amongnü Delhi chief minister Rekha Gupta-i, Arvind Kejriwal-i aniba taoba sorkari Delhi Union territory nung senpong azüngtettsüogo, ajisüaka election nung BJP-i nangzükba ama tetsürtem nem ita shia sen 2,600 agütsütsü, ta ashi.

Rekha Gupta-i, tetsürtem nem senotsü teyari agütsütsü atema asalentong jungjunga yangluba sülen ang scheme ji tenzüksü, ta metetdaksü.

Hombarnü Delhi assembly senden tenzüksü lia Amongnü state party office nung Delhi Chief Minister den BJP MLA tem senden mena liasü.

Senden tembangba sülen osangbenertem den jembidang Rekha Gupta-i, tetsürtem nem ita shia sen 2600 agütsütsü atema Mahila Samridhi Yojna scheme tenzüksü asoshi shilem lemsar senden aika menogo, ta metetdaksü.

Honibarnü AAP lenir Atishi-i shidi ka ajanga Rekha Gupta dang, election mapang nung Ato kilonser Narendra Modi-i tetsürtem nem ita shia sen 2600 agütsütsü nangzükba dak sendakba nung o lemteptsü atema AAP nungi lenir kari nenok den senden menner, ta metetdakja liasü.

Election mapang Dwarka nung lokti senden ka nung jembidang Modi-i tetsürtem nem ita shia sen 2600 teyari agütsütsü nangzükba liasü, ajisüaka February 20 nü mezügbuba Cabinet senden nung BJP-i iba scheme atema mejembi.

Congress aser AAP aija Gupta-i, "Congress-i küm 15 tashi Delhi yimsü süogo, iba sülen AAP-i yimsü asü, ajisüaka parnoki Delhi nüburtem tebilemsü onük atema kecha meinyak. Tang ozü sorkar anogo ka dang, saka parnoki onok dang tasüngdanga akar," ta ashi.



February 23, 2025 nü New Delhi nung Delhi Lt. Governor, Vinai Kumar Saxena-i Flower Festival 'Palaash 2025' semzüksüba sülen tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, FEBRUARY (TSÜKLAI) 24, 2025

NFHRCC mulung südaktsütsüla

Nagaland nung nübortem jajatsüba lenmang dena nübortemi longkak aita akang nung dang state government-i inyaktsür. Ibayongji, küm ter jakdang Assam mekendoka Naga nunger jajatsüba lenmang, koba dang tenemtsüng lenmang, Foothill Road, ta ajar, iba lenmang yanglutsü asoshi Ao Sendeni anir Ao Senso Telongjem Dimapuri shilem tulu agia Naga kintemi state government dang takangba tulu agüja aruogo. Ibayongji, tang tesüsa iba lenmang yanglutsü atema government-i senotsü bushiteta bener aruagi inyak tenzükba asenoki angashir. Iba asoshi state government dang pelatsüla tuluka lir, kechiyong nübortemi akangyonga meinyaktsüka asübo nübortemsa akoksatsü. Aji oda, kodanga meinyakba dang nungibo menur asüyonga inyakbajisa tajungba ta shin nung jembiba ama, nübortem mapa boluba aser nüngsen agi langa tang danga mapa tenzükba aotsü atema contractor-tem nem mapa lemtsübaji ajak asoshi osang tajung ka asütsü. Ajisüaka, mapa inyaktsü pur contractor-tem kari Nagaland Foothill Road Coordination Committee (NFHRCC) purtem den mapa shitak junga inyaktsü asoshi tangatettep ken o ayutsü memelungba agi tesem kar nung mapa tenzükba moutettsüsa akümbaji tesasatsüka asütsü. Atangji, mapa kiburji government, anungji government -i inyaktsü, ajisüaka lenmangjibo nübortem meyong, anungji nübortemi mapaji jungjunga repranga inyakdaktsütsübaji temetena lir aser khureta lir. Ano, iba tenemtsüng lenmang yabo nübortemi timtem jenti agia kangzükba mapa ka lir, anungji NFHRCC purtemi ashiba amaji, parnok tebang iagi junga inyakdaktsüka mesüra, parnok timtemba anogotem ajakto amajok akümtsü. Ano, ibaji dang masü saka iba lenmang yabo kangasa yangludaktsünüba agi, arogotemi dena tenla sarutepa Nagaland government nem sden terabo agütsüogo. Ashibo, iba senji government senpong nung enoker mamshii alitsüa akok saka sarasadem mapa tajung agia chief minister nem iba sen cheque agütsübabo nguogo. Senji amshiang, tamshi saka iba mapa jagi nübortem sadema jajatsüsa lenmang maka timtemba aser nübortem taginüba sayur. Atangji, iba tenemtsüng lenmang ya Mon district nungi Longleng, Mokochung aser Wokha district ajanga aruagi Niuland aser Dimapur ajanga aotsü, ajisüaka iba lenmang nung item district purtem dang jajatsü ta masü aser item district purtem asoshi dang yanglutsüba lenmanga masü saka Naga nunger inti jajatsüba lenmang lir, anungji Naga nunger ajaki temulung kanga agüja iba lenmang yanglutsüba nung shilem agiba angur. Ashiko, NFHRCC amaka tenteter tanen maka government nem takangba agüja meinyak asübo, tang tashi tenemtsüng lenmang yanglutsüba asoshibo sen maka nung temer metetzükteti lila. Aji oda, NFHRCC purtemi Naga nunger anisüngzüktsü asoshi timtem aser nüngsen jenti agia inyakba mapatemji nübortemi reprangtetsüla aser government nung alirtemia züngoktsüla. Parnoki timtem jenti agia inyakba langa lenmang shitak junga yanglutsü ta lenmang yanglutsü pur contractor-tem den NFHRCC purtemi tezülutepba ka yudi ta asüba nungji contractor-temi tamajung mangatettsüla saka mapa junga inyaktsü tangatetba aser tebilemba nung government dang nungi mapa meshizük süra, iba ama mulunglemteptsüba tangatettep ken o nungbo hai haura kaa züluteptsübaji mulungtsüla. Ano, talisa mapa shitak junga inyakdaktsünüba agi NFHRCC purtemi ali kiburtem den jembia alimenoka memeshidaktsü aser linük tenzükertem teloktem den jembia contractor shinga nema alimelen memeshidaktsü. Iba denji ano, iba lenmang yanglutsüba mapa yabo yimjak nung tender notice advertisement agüja teinyakner contractor-tem ajak jaoka jenjang latetdaktsür inyakba mapa ka masü saka jenjang dalang agi contractor-tem rongnung metoktepdaktsüi tangatettep nung, mapa dang junga inyakerbo ta ser, lema inyakdaktsüba mapa ka lir. Item ajakji government nung alirtemi aser contractortemi züngshia NFHRCC purtema mulung südakja inyakra, tesüsabo Naga nungersa ajangzüktsü.

OLEMSABANG

LENMANG ANA NUNGI KONANG

~ Süpongñügsang Longkümer, Darogapathar Dimapur

Asen Aor otsüla abuola nungertem mezüng yongi shisa taka telok liasü ta parnok mapa aser inyaksangshi ajanga angatetter. Parnok mapang sen maka, saka oset o oset na melentepba shishilembatepba arua alitang tesü Jabilee yanglua aji agi shishilemba-a aru-a ta angazük. Süoshi asoshi kumba lu yima kümbaji longmejak dak menünga ang ina (yanglua) süpu (temesüng) adak aser aji tanak akinüra osak nung arem, Wakong sentsü akinüra aozü nung arem, temerem akinürtem aozütemji tapu tapu meyoktepber temerem adokdaktsü anungji item dangji süremsü ta jaa aruba bilemtetter. Asen Aor sü tapu aika liasü, temesüng angjang pezü tanak angjang pezü ratepba adakba dang Posü sü ta aja, Tanak pezü angdong (Blue) pezü ratepba dang etsüng sü ta ajar. Posü sü aser etsüng sü tenaji sentsü palala ashe katepba adakbajibo kasa tang tashi lir. Kari temesüng tang apen, iba dangji süpu ta ajar. Shiri küm palala nung Sü terok chidir parnok dangji tapensar ta ajar anungji parnoki tapensa sü apena arur aser parnokjibo ozüme terok songloktsür, Tetsür tema kolang nung ozüme songloktsütsü aser tapensa süpete ten Azü jangnep sü apendaktsür. Sübangsü nunga, aürlepber sü pai sü mechira sü meinoker, Takartem-a mangku melepra Noknü aser mangku meinkdaktsü, Sensakertema Sübangsü apentsü akok saka tsünko sü nungji An dak alaka shiruru kecha meinokdaktsür aser süngnaktzü agi zülubaji-a pezü sükle tekolak len aser tsünglanglen sükdangle ta atepber iba dangji koiyang sü ta ajar. Tetsür süpete, (teprem sü), Takar o sensaker sentsü palala sensaktsürtem süpu aser sünak tang pete. Tepor Langtem sensaker, süpu langtem tang atem iba nung kecha marlok, saka takar langtem angdong nung temerem tapak ana takoktsü aser langtem kinük ana aser tiyong nung züpu alenloker akia aru. Takar aser sensaker, Temeranger o azümesen tsüngtaji Konang ken agi palala anüng aser ali. Tawa tanüpo nüpur mongdang, yim mongdang ajak nung tetsüri Linük sü ten etsüng sü mesüra azütsüngnep sü apenür sentepberji mera taket meremzuka sentepberji aküm taket angur, yamaji tepor ajaki Tsüngkotep sü apenür sentepberji koda mera taket tepur tajung aser iba jagi yimden yimli aser subaliba ayak konang metetdaktsür.

Süpusülemtsü, ya lokdi senden palala nung koba ama süputsüla bentetbenteta angatet nungpo mera taket südisü ta reprangtetter. Alima nung aliba Tsüngrem ki (Tenlaki) dak alema tang tashi asenoki ano meimchir maliba lima nung Tsüngrem ki mangu. Alima nung aliba Tsüngrem tenlaki nung Tsüngrem konang angutsü asoshi yimsüsürtem-a, tulurtem-a, takartem-a, aser sensaker aser tilartem ajak Tsüngrem tsüngdangbo kasa tang shinga tuluba, tilaba mali anungji Tsüngrem tang ajemalu sayutsü asoshi alima konang süoshi masü saka asenok Aortem sübang sü aser tapensa sü dak alaka sü tajung aika lir. Anungji itemji merükmerüka sübur tekülemi aru nung aji Tsüngrem tsüngdanga teperi. Temükong mapang mesüra tetsüria sü mapene tekülemi arutetter. Tenlaki ya Tsüngrem ki-a ta mangatet tashi Sannükeri anir amangbapur ajak süngkong kidangi Napong atu ama tang asütsü (Tazüng).. Tenlakidangi arurtem rongnung shiba Tsüngremi akizüktettsü taküm temerük ali parnokji Yimsüsür aser tulur dang-a taoba. Khrista dak amangertem asoshi arogo atema kisü jensütsü kanga nüngdak. Kechiyong idakji senteper külemtsü aser rizünga ayutsü, aser anisüngzüktsü. saka Tsüngremi tenlaki kowe asü mesüra arogo nüngdak atema teka mapa kowe renema ali ta masüngtangtsü, itemjibo samatsü saka samaba tanüla kowe anir aru ta kibubai asüngtangtsü (ibaji mapa ten Tamang sütepba ainba ataloktsür asütsü..Anungji samaba tanüla kowe anir aru ta pa tenzükertem dang asüngdangtang mapa aser tamang sayutettsüsa inyak nung kanga jungdisü. Tsüngrem tsüngdangbo mapa medene tamang tasü ta ashibaji teka mapa indang masü ,tanüla mapa atema Laishiba jagi ashir ta angatetti. TSÜNGREM KONANG NÜNGDAKKER.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Tsüklai (February 23,2025) Amongnü Unity Ao Baptist Arogo nung Tetsü Oshi Anogomung sentep sentong nung lanurtemi ken atenba noksa nung angur. Iba sentong nung tongti o jembir , Tir Yimyim yimozülur K. Temjen Jamir liasü. Iba kasa anogo nung ABAM den dena aliba Arogo ajak nung kasa Anogomung sentep sentong agia mungogo.

Kuala Lumpur nung Global Chinese Alpha conference agitsü

February 23, 2025: March 18-19, 2025 anogotem nung Malaysia yimtiba, Kuala Lumpur nung "Revival 2025 - Global Chinese Alpha Conference" (GCAC) agitsü, aser iba senden ajanga China nunger Khristantem longjemtsü. Kuala Lumpur nung aliba Mega Star Arena nung iba sentong agitsü. Iba sentong nung linük 30 nung aliba Arogo 500 shi nungi nisung 3,500 adentsü imlar. Iba conference agiba nükjidong ya alima nung Khrista osangtajung prokba nung China nunger tamangertem teinyaktsü shilem jangjatsü atema lir.

2 Timoti 1:5- nung ajemdaker iba conference nung tamang jenjang ajanga kija-kibongtem, Arogotem aser loktiliba koma kongshir, ibaji asadangtsü aser alima nung China nunger Khristan nütsüng arentsü atema jembitsü.

Alima nung China nunger nütsüng billion 1.5 dak tali lir, anungji Khrista osangtajung prokba nung China nungertemi

tongtiban shilem agitettsü. Iba conference ya Alpha organization-i ayongzük. Iba organization-i tesüiba küm 30 tsüngda nisung million 30 dak tema den Khrista osang lemsatepogo.

GCAC 2025 senden nungsa Alpha rongsen aser asalentongtem ajanga Arogotem, mapa inyakba tesemtem, kibongtem nung tamang jenjang indaktsütsü aser region balala longjemer mission mapa inyaktsü atema jembitsü.

Iba Conference indang tongti nükjidong asem lir. Mezüngbuba nükjidongji mangdang jangjatsü atema lir. Iba senden nung adenertem ajungmesotsü atema onük aika jembitsü aser taküm kulitem lemsateptsü. Ibaji ajanga alima tesem balala nung Khrista osangtajung lemsateptsü atema China nunger Khristantem ajungmesotsü.

Tanabuba nükjidongji alu arutsü atema renemtsütsü asoshi lir. Iba conference nung shilem agirtemi Tenla kitem,

mapa inyakba tesemtem, lanur teloktem aser kibongtem nung Khrista osangtajung tajungtiba nung lemsateptsü atema tesayuba agütsütsü.

Tasembuba nükjidongji ajungmesoba lir. GCAC 2025 nung alima nung Khristan lenirtem sendakteptsü, longjemer inyaktsü aser nütsüngsütsü atema training agütsütsü.

Iba conference nung adentsü atema mission mapa inyaktsü jangrar China nunger Khristantem ajak jaoker. Iba conference nung adenba ajanga tamang jenjang asentenshitsü aser mangdang tasen angutsü.

Iba conference nung China nunger Pastor tem, Arogo lenirtem, Market nung lenirtem, lanur lenirtem aser tamangertem aika adentsü imlar.

Iba conference nung adentsü jangrartemi official conference website nung osang tejanga angutsü. GCAC 2025 ya alima nung China nunger Khristantem atema kanga tongtiban sentong ka asütsü.

YWAM-i mission atema sarasademjang ta mepishia metetdaksü

February 23, 2025: YWAM tentetsang, Loren Cunningham 2023 küm asüba aser tawa organization-i timtem balala ajangshiba sülen Youth With A Mission (YWAM)-i parnok pusemertem dang iba mission atema sarasademjang, ta mepishi.

Tang tesüsa YWAM-i "The Invitation" ta ser ita shia sarasademtsü atema tayongzükba ka agütsüogo. YWAM-i parnok indang mission tamendakdakji sarasadem lir ta ashi.

YWAM-i sangdong ka ajanga, "Mezüngpurtemi alima map ka matsüngdang sarasadema mission mapa tenzüka liasü, iba sülen Tsüngremi onok den jembu tenzü aser linüktem atema inyaktsü asoshi onok den jembu," ta metetdaksü.

Yaküm September ita Manila nung "YWAM Together 2024"

sentong nung linük 120 nung tenzüker nisung 4,500-i shilem agia aden. Iba mapang nung tongtibanngtiba tayongzükba sarasademtsü atema liasü.

YWAM-i, "YWAM nung onoki timtem kar ajangshiogo. Kibong nung medemer aser lenirtem kar süadokogo. Tayongzükba jenti lir aser iba ya atangji tongbang ka lir. Onok mission atema sarasademtsüji tang mapang ya lir. YWAM nung shilem agir ajak sarasadem nung aintsü atema sarasademjang aser YWAM prayer ministry ajak asoshi sarasademjang," ta metetdaksü.

YWAM nung züngsemtemi Tsüngrem ajangshitsü, Pa ola angashitsü aser linüktem nung mapa inyaktsü atema sarasademjang, ta YWAM-i metetdaksü.

"YWAM atema sarasadem ya tongtibanngba," ta YWAM yaritepa tentetla aser Loren

Cunningham kinüngtsü, Darlene Cunningham-i metetdaksü.

YWAM tentetsang, Loren Cunningham 2023 küm October 6 nü alima nungi pila; pa arrshi küm 88 liasü. Loren Cunningham dak tepokpok cancer 'stage 4' puteta liasü.

Cunningham arrshi küm 20 asüadang aser Bible college ka nung azüngdang pai alima tesem ajaklen Khrista osangtajung proktsü atema pa dak tejangraba tulu liasü. YWAM ya alima tesem ajaklen Yisu tenzüksü atema sobaliba balala aser zünga balala nungi bendanga agütsüba lanurtem indang Khristan movement ka lir.

YWAM tentetba sülen küm 66 buba arudang iba organisation ya alima nung Khristan mission tulutiba rongnung ka kümogo.

2010 küm YWAM küm 50 ajungba mapang nung YWAM nung toklang volunteers 30,000 dak tema liasü.



February 23,2025 nü Mangimen Ao Baptist Arogo nung Sunday school tanurtemi Tetsü Oshi anogomung sentong nung shilem agiba noksa nung angur.

ANOGO ABEN TSÜNGREM DEN

TSÜNGREMER ANGATI TEKÜMTET

Kechiyong taochi agi tamang ajanga nenok kümzükogo; aser aji nenok pei sasai inyakba agi masü, saka aji Tsüngrem sempet. Shingaia asüküma moulutsü asoshi aji mapa agi masü.

~ **Efesa 2:8-9**

John Newton England Olney nunger shiba küm 47 tain alidang pai "Tesüngmangtsü Taochi" ken ya pa taküm nung Tsüngrem taochi meteter külen 1772 küm zülü. Otsü agi ashiba agi tetsüji Tsüngrem metetba tetsü tajung ka liasü, saka tebui Tsüngrem memetet liasü. Tia maka John Newton tetsü pa tanur asüadang süadok. Iba mapang tebuji rongnir ka liasü aser pa-a tebu ama rong anier ka aküm. Pa ya alartem shibelenba mapa inyakdang tzüym-tzüsem tulu adoka ghonda 36 tashi timtema liasü, aser iba mapang tamanger kar iba rong nung liasü aser iba nisungi Tsüngrem ne taochi kü nem kua ta sarasademba angashia paia Tsüngrem bushitsü belimtet aser pai Tsüngrem dang aochiang ta sarasadem. Iba tatalokba dak ajemdaker Tesüngmangtsü Taochi ken mejema pa sayutsüngir tajung ka aküm.

Tsüngremer taochi ya asen ajungba agi masü, saka pa angati tekümtet pa chirtem nem agütsüba lir. Aseni merangba agi masü, saka masadangtetba taochi pai agütsü. Asen dak alangba agi masü saka Tsüngrem taochi ajanga, techir Yisu Khrista ajanga asenok dangi jongkai adok. Ajangla, nenok mejungi liaka nenok chirtem nem sempet tajung agütsütsü nenoki meteter, nenok kotaker Tebui pa dang meshir nem Tanela Temeshi koda tali magütsütsü? Luke 11:13 Asenoki tamang agi Tsüngremer tekümtet agizüker pela lidi.

Indonesia school tem nung Khristan yimsü tesayurtem nüngdaker

February 23, 2025: asütsüla. Khristan Indonesia nung nütsüng kaketshirtem dang sayutsü shilem 13 dang atema Khristan yimsü Khristantem lir, ajisüaka tesayurtem nem iba linük nung tang tashi lemzüksür, aser ibaji Khristan tanurtem atema school tem aika nung Khristan yimsü indang temeden ka lir," ta ashi. Khristan yimsü mali, ta February 22, 2025 nua International Christian Indonesian Christian Concern (ICC)-i Religious Education Teachers Forum-i kasa metetdaksü. Teachers Forum-i kasa February 14, 2025 nü senden ka nung Indonesian Regional Representative Council nung züngsem lempetba sentong ka ayongzüka agiogo.

"Lanurtem taküm yimya tajung nung anitetba nung Khristan yimsü tesayurtemi tongtiban shilem agir. Khristan yimsü tesayurtem agi anüngba tebilemstü atema tang rongdak süa inyaktsüla," ta Jakarta Regional People's Sudirman Simanihuruk Representative Assembly nung züngsem," Ir. Manuara Siahaan-i ashi.

Ministry of Religious Affairs Office nung tongti, H. Sahidul Bakhri-i, Khristan yimsü tesayur maliba Khristan kaketshirtem kwi aliar ibaji tejangja metettsü nüngdak, ta ashi.

February 14, 2025 nü senden ka nung Indonesian Regional Representative Council nung züngsem Rev. Penrad Siagian, Christian Community Guidance Director General Dr. Jeane Marie Tulung aser Christian Community Guidance Office, Ministry of Religion nung Christian Education Director, Dr. Regional People's Sudirman Simanihuruk nungeri school tem nung Khristan yimsü tesayurtem maliba tebilemstü onük lemsatepa liasü.

Siagian-i, "Iba timtem ya tang tasen masü. School kar nungbo tesüiba küm aika Khristan yimsü tesayurtem kaketshirtem kwi aliar ibaji tejangja metettsü nüngdak, ta ashi.

AO OSHI ANGAZÜKDAK:**TANÜ ANGAZÜKTSÜBA OJANG**

Tejungnüren

(adj) putepa linüba temeim mapa (generosity)

* Nisung tajungi tangar den tejungnüren mapa inyaker.


Tekaka

(n) temo temerang, melamelaa kaksar (hard fatty)

* Nashi kar dakbo temo tekaka alir.



Tir Yimym

OLONG PAITEP # 7073**TIPIEN**

2. Sü jeplok
4. O agi merenshi
7. Ayongküm li
8. Chiyungtsü mapang süiadok
9. Tsüngrem den jembiba
12. Saklok
14. Samaba mebushitet
15. Mejanga onü
16. Tzü shiruru ka

-

LANGTSÜNGLEN

1. _____ i
3. Kasa masü
5. Nüchi masü
6. Tashi endok
9. Langtem
10. Anü malidang
11. _____ kibur
13. Tebur tembar tsüngda jatepba-

OLONG PAITEP # 7072 TELANGZÜBA**TIPIEN :**

1. Semtu, 3. Lepko, 5. Bilem,
8. Ulu, 10. Tsüngpang,
11. Tesangwa, 13. Aoksa,
15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak,
9. Zünga, 10. Temopu,
12. Walu, 14. Ali.



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimym bureau tem nung agüjang.

Tepela
Tasoba Anogo



1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

CM Sarma-i USTM ken o nung kaketshirtem tenüing metetdaksü

Guwahati, February 23, 2025

(Agencies): Assam Chief Minister Himanta Biswa Sarma-i University of Science and Technology Meghalaya (USTM) tatidang nung ashikülak inyakba osang tejangja metetdaksüogo.

USTM Chancellor Mahbubul Hoque-i CBSE examinations nung marks tajung agütsütsü nangzükba kaketshirtem tenüingtem Chief Minister Sarma-i metetdaksü.

"USTM kibur Mahbubul Hoque-i CBSE examination nung marks tajung agütsütsü

nangzükba kaketshirtem. Assam Police-i iba ken o atema bushisüngdang asür aser ken o ka benokogo. Iba ya tebilemtsü khuret tulu ka lir aser sendaka alir ajaki amalitepa yariteptsüla" ta Sarma-i ashi.

February 21 aonung Guwahati kübok Ghoramara nungi Hoque apuba sülen iba ya jungkai adokogo.

Kendriya Vidyalaya, Sribhumi district nung CBSE Class 12 Physics tatidang nung sen meshiba sülen yaritsü nangzüka liasü ta ken o benoka lir.

Iba centre nung kaketshir

274-i tatidang agütsü aser parnok rongnung ERD Group nungi kaketshir 214 dena lir. Parnok tatidang nung yaritsü ta nangzükur sen meshia agi saka teyari manguba agi examination centre nung meinprong adok.

USTM-i taila degree aser kulikakettem agütsür ta Chief Minister Sarma-i tai tonglokja liasü. Tatidang timi magii PhDs dena sen yong ayoker ta paisa ashi.

Hoque ya tang police ket nung lir aser pa dang asüngdangya asütsü atema Sribhumi-i anir ogo.

Tripura nung sen crore aika alang hon aser ganja apu

Guwahati, February 23, 2025

(Agencies): Assam Rifles aser Customs Department külem telok kati West Tripura district nung Rs. 1.02 crore alang hon aser Rs 10.29 crore alang ganja seret 2286.9 puogo.

Badarghat tesem nung gold bars 14 aser ornaments kar apu aser iba dak sendakba nung nisung 2 puogo.

Tanga tatalokba ka nung Assam Rifles aser Customs Department külem telok kati

Vijayanagar nung ganja seret aika apu.

Osang tejangja angazükba nung ajemdaker iba mapa ya inyaka liasü aser ozüing alema shibelenertem police ket nung agütsüogo.

Arunachal Democratic Party-i Religious Freedom Act magizükur

Itanagar, February 23, 2025

(Agencies): Arunachal Democratic Party (ADP)-i Arunachal Pradesh Freedom of Religion Act (APFRA), 1978 mapa küma inyaksü magizükba metetdaksüogo.

Iba Act ajanga tamangba yimsü tsütsü telemsa adokdaksütsü ta ADP-i ashir.

"Asen sensotem taremzük aser secular tangatetba lir. Iba Act benoktsü nüngdak madoker" ta ADP President Tami Pangu-i ashi.

Chief Minister Pema Khandu-i political telok kari tajanzük angutsü atema iba Act anema ola adoker ta ashiba atema "Iba nung political tsütsü tajanzük angutsü kecha mali, kechiyong assembly nung opposition tashi mali" ta Pangu-i ashi.

"ADP-i putepa alitsü ajungkettsü aser asen loktiliba nung telemsa madoktsü atema noktaker. Asen sensotem ajungtsü atema onoki tebilemtsü lemsateper" ta lai ashi.

"Asenok sobaliba aser tamangba yimsü balala süaka Arunachali nunger ama longjema lir. ADP-i state nung kija shia indang inyaksangshi aser tamangba akhümtsübur aser kümzüka ayur" ta Pangu-isa metetdaksü.

Telemsa adoktsüba ozüing ka masü saka sorkari lisopurtem nem temeten agütsütsüla aser ibaji Article 371 (H) kübok statehood agütsüba nung metokmeperi alibattem yanglushitsüla ta ADP-isa ashi.

CM Khandu'er sorkari Article 371 (H) agientsü aser Articles 371 (A) o 371 (G) kübok dendaksütsü atema mapa inyaksüla. Nagaland aser Mizoram-i temeten anguba ama Arunachal-ia temetentem angutsüla ta ADP-isa metetdaksü.

Külen, Indigenous Faith and Cultural Society of Arunachal Pradesh (IFSCAP)-i state sorkar dang tangsa APFRA mapa tenzüktsü rongshiogo.

Iba Act ya ita trok tsüngda mapa küma metenzükra timtem

ajurutsü ta IFSCAP-i ashi.

"Tesüiba sorkartemi mapa meinyak aser 1999 nung society tentetba sülen-a Act atema mapa kecha meinyaki dang arur" ta IFSCAP spokesperson Pai Dawe-i ashi.

"Asen sobaliba aser inyaksangshitem ya wazüka ayutsüla. Sorkari iba Act ya mapa küma tenzüktsüla" ta Dawe-isa ashi.

Arunachal Christian Forum's (ACF)-i iba Act nung tashiyim keta lir ta ashiba atema IFSCAP-i "kodaser 1978 nung Governor aser President nati agizükba ozüing ka dak tashiyim keta lir ta ashir?" ta asüngdangogo.

Tawa ACF rally nung MLA aseme shilem agiba aitsür kechiyong MLA temi tamangba yimsü ka den dang madentsüla ta IFSCAP-isa ashi.

Parnokisa state sorkar dang Act mapa küma tenzüktsü mepishi aser iba ozüing agienra anema noktaksü metetdaksüogo.



February 23, 2025 nü Assam Police-i Khatkhathi Police Station kübok Karagaon Naka Point nung opium seret 18.108 apuba sülen agiba noksa ka angur. Police-i truck gari ka nung opium bena aliba apu aser iba dak sendakba nung nisung ka pua lir. Assam Chief Minister Himanta Biswa Sarma-ia iba atema Assam Police nem tenüingsang agütsüogo.

Russia-i drone amshia Ukraine amak

Kyiv, Tsüklai/February 23 (Agencies): Russia-i drone jenti amshia Honibar aonung Ukraine amak, koba rara tenzüker tang tashinung tesashitiba alitsü, ta ketdangsür temi ash.

Ukraine indang Air Force Command odongtar Yuriy Ignat-i ashiba agi, khi yongi Russian drones 267 khaloktsü. 138 shi anüung nung lia khazüka yok aser 119 shi sama aser teraksa balaka magütsü.

Honibar aonung yokba drone aika raksatsü aserregion kar nung ki o jen raksaa mi adok, ta emergency services ajanga ash.

Russia-i tashi ajak amshia Ukraine amak tenzüker küm asem buba ajungtsü lia iba ya atalok.

Iran-i yangluba drones tem Russia-i amshi tenzüker linük nung drone amshia amakba rongnung ibai tesashitiba alitsü, ta Ukraine Tir Volodymyr Zelensky-i ash.

Pai sangdong ka nung ashiba agi, tan hopta Russia-i attack drones 1,150, guided aerial bombs 1,400 aser misiles tabu balala 35 Ukraine dak khaloktsü.

"Ukraine nung teti atema

yimjung bener arutsü asoshi asenoki akokba ajak inyaktsüla," ta Zelensky-i ash.

"Ibai partners ajak lungjemba ajanga akoktsü - asenoki Europe ajunga tashi, America tashi aser teti asoshi yimjung bushir ajunga tashi nüngdaker."

Ukraine sorkar aser anüolen itdangiter temi ashiba agi, Russia-i 2022 küm tatemlen nungi Iran-i yangluba Shahed-136 drones (kamikaze drones ta ajar) amshir.

Item drones ya mezüingbo Kharkiv region nung military targets amaktsü amshi ta ashir, saka tangbo nüburtem aliba tesemtem aser energy infrastructure tem amakdang amshir.

Taoba mapang Iran-i rara metenzükdang Russia nem drones ishika agüja liasü ta ash, saka US aser EU nati Iran-i mapang shia Russia nem drones agütsür ta aitsür.

Honibar aonung drone amshia amakdang nisung kwi asüar mejangja, saka emergency services-i nisung asem shi asü ta ashir.

Ukraine south tsütsü

Kherson nung nisung aliba ki ka nung amak aser yangji tebur ka aser jakrep ka tetsü asü, ta Ukrainian state emergency services ajanga ash.

Kryvyy Rih yimti tiyong nunga tebur ka asü aser asem yiru, ta region ketdangsür temi ash.

Kharkiv, Poltava, Sumy, Kyiv, Chernihiv, Mykolayiv aser Odesa densema region 13 nung drones tem khazüka yok, ta Ukraine ketdangsür temi ash.

Russia-i yasüung ballistic missiles asem khaloktsü ta Ukrainian air force ajanga ash.

Kasa mapang Russia defence ministry-ia Deobarnü ashiba agi, yasüung Ukraine ajanga drones 20 Russia linük telungi yokba raksatsü.

Hombarnü iba rara ya küm asem buba nung ayaoka aitsü.

Külen US aser Russia ketdangsürtem hopta tetenzüklen Saudi Arabia nung iba rara tembangtsü asoshi jembishinü tenzükogo, ajisüaka Ukraine densema Europe nungi lenir kata iba senen nung mejaok, anungji European lenirtema kanga arsanga Paris nung senden amener.

Nasrallah den asüpila sentong nung nisung aikati shilem agi

Beirut, Tsüklai/February 23 (Agencies): Taoba Hezbollah lenir asür Hassan Nasrallah, shiba taoba küm September ita Israel-i linük yimtiba Beirut indang southern suburbs amakba mapang tepseta liasü, pa nem Lebanon nung nisung meyirejang aikati tetushi agütsüdar.

Security dak sendakba nung tetsükdaktsü aliba ajanga yimjak nung pa den asüpila sentong ya magi-i arur Deobarnü Beirut indang Camille Chamoun Sports City Stadium nung 1 ako nungi tenzüka agiogo. Iba stadium nung nisung 50,000 shi asemer.

Hezbollah teloki stadium telung nung menden talila aika laloktsüogo aser kima nunga giant screen ajanga mangyimertem sentong nung shilem agitsü atema menden aika toktsüogo.

Asüpila sentong magi tsüingda Nasrallah aser pa meletsü ta imla alisang Hashem Safieddine na indang noksa tululu south Beirut kübok jara aser apu balala nung inokja liasü. Safieddine-a Nasrallah tepsetba sülen hopta ka lir Israel-i anüung ajanga amakba mapang tepseta liasü.

Beirut nungi Al Jazeera osangbener Zeina Khodr-i ashiba agi, Nasrallah ya Lebanon nung Shia nunger asoshi tebu ama liasü.

"Nasrallah ya parnok asoshi lenir ka dang masü, saka pa ya tebu ama, parnok tekümszüker ama liasü kechiyong parnok ya Lebanon nung küm aika mezüngshi-i aruogo," ta lai ash.

"Parnoki shinübaji parnok ano tashi ita lir aser yimden yimsüsüba nung tashi lir," ta mangyimertemi ashiba Khodr-i metetdakja liasü.

Ali Daamoush nung Hezbollah ketdangsürtemi Honibarnü ashiba agi, linük 65 nungi lenir 800 shi-i asüpila sentong nung shilem agitsü aser iba den linük balala nungi activist aser nübur meyirejang aikati shilem agitsü.

"Ki, yimtsüung aser yimti ajak nungi arong, ajita asünungdang asenoki asen tsükchir dang iba resistance ya mesamatsü aser raratsü atema renema lir ta shitetsü," ta Daamoush-i Israel atishia jemb.

Nasrallah ya küm semer dak tema Hezbollah lenir liasü aser pa o Safieddine na

ya tesem ka nung meima khi atema rema yur liasü, kechiyong asüpila sentong aliba ya Israel nunger sepaitemi minprongtsü akok ta bilema liasü.

Nasrallah ya Beirut indang southern suburbs kübok airport lenmang anasa ali ka nung aremetsü. Kasa mapang nung Safieddine ya southern Lebanon nung Deir Qanoun en-Nahr jila nung aremetsü.

Kasa mapang nung Lebanonese state media-i Deobarnü ashiba agi, mangyimertem Beirut nung adenshiba mapang Israel nunger sepaitemi arrtsü anasa tesem balala makogo.

"Tyre district kübok Qleileh aser Sammaaiyah na tsüingda tesem ka tsükchir tayimtsü agi maka liasü," ta official National News Agency yagi metetdaktsü.

Israel military-i southern Lebanon nung rocket launcher tem dak rangloker maka liasü aser iba ajanga asüpila sentong magi tsüingda civilian tem amokmerena liasü.

"Mapang tatsüka tejakdang IDF-i [Israeli military] itangiter osang dak ajemdaker Lebanon litsü nung rocket launcher aser tanga hadirtem yua aliba military tamendakdak ka makogo, kong Hezbollah züingsemtem densema liasü," ta military sangdong ka ajanga metetdaktsü.

"Iba den bendenloksema Israel nungertem amokmerenba rocket launchers aika southern Lebanon nung amendaka aliba makogo," ta kasa sangdong ajangsa metetdaktsü.

Israel aser Lebanon na November 27 nü nungi ceasefire benoker arudar. Israel aser Hezbollah na arrtsü adena raratepa aliba September ita rara küma aoba sülen ita ti lir ceasefire ya benoka liasü.

Ceasefire atema nangzükteper aliba kübok Israel nunger sepaitem January 26 nü tashi nungbo southern Lebanon toktsür aotsü nangzükteper liasü, saka Israel-i tesem kar nungi atsüingintsü memulungba sülen tatembangbuba anogo ya February 18-i atsülangja liasü.

Israel army southern Lebanon kübok jilatem nungi Mongolbarnü atsüingnogo, saka arrtsü nung outpost pongu nungibo maishi-i lir.

Netanyahu-i Gaza yimjung raksatsütsü inyaker: Hamas

Gaza City, Tsüklai/February 23 (Agencies): Israel Ato Kilonser Benjamin Netanyahu-i Gaza ceasefire tezüngzüktep raksatsüsa inyaker, ta Hamas-i tai tongloktsü aser Israel sorkar-i ceasefire noklen tanabuba atema jembishinü masür, koba March 1 nung tembangtsü lir ta ash.

Agreement phase tanabuba aser tasembuba ya tepang agibo mulungtepa lir südi ta angateter, aser ibai mezüng phase hopta trok alidang jembishinü tenzüktsü liasü aser iba mapang Israel nunger pua alirtem den Palestine nunger tepuokdak alirtem melentep, Israel sepai kar Gaza nungi anizüker ao aser teyari oset balala Gaza telungi yok. Phase tanabuba ya asangsang kumra, Israel nunger pua alir ajak chioktsü aser teti atema ceasefire alitsü.

"Right-wing sorkari yimjung tezüngzüktep raksaa ano tanaben rarai meyipa aotsü jangra aliba sayua asaya tamajung asayar," ta Hamas political bureau nung züingsem Basem Naim-i ash.

Gaza nung yimsü asüba

Palestine nunger telok ya iba agreement nung shidak nokdaka lir aser tezüngzüktep sülen shidak anidaka arur, ta pai ash.

Israel-i iba tezüngzüktep nung aibelener, ta pai aitsü. "Ceasefire mezüng phase nung Palestine nunger 100 dak tema tepset, züingzüktepba humanitarian aid timba Gaza telungi maitdaktsü, aser Gaza north aser south sadangba Netzarim Corridor nungi sepaitem ainshitsü aliba thinen," ta Naim-i ash.

Iba ceasefire agreement nungya Israel-i mobile homes 60,000 aser süki 200,000 Gaza telungi aitdaktsütsü mulungtep, saka yamaji meinyak. Gaza nung Palestine nunger 2.4 million aliba shilem 90 dak tema tesem balala nung jenshia lir aser tesem tuluba ka ajasaogo.

October 7, 2023 nungi tenzüka Israel-i Gaza amakdang Palestine nunger 48,319 dak tema tepsetogo. Gaza nung aliba Government Media Office ajanga ashiba agi, nisung 13,000 dak tema ki o jen teraksa agi nembanga lir aser süogo ta amanger.

Hamas-i October 7, 2023 nü Israel amakdang nisung 1,139 tepset aser 240 shi pua bener ao.

Netanyahu-i Gaza nung maneni raratsü amokmerena arur aser United States-i Gaza aser yangji aliba Palestine nunger agitsü tasa benokba ama inyaktsü temulungtetba lir ta ashir. Tangbo Trump iba sentong nungi pilar amai ajiteter.

Israel leniri Hamas indang mitkar aser yimsüsütsü tashi samadaktsütsü densema rara indang nükjidong ataloktsü temulungtetba lir ta shijen ashir.

Hamas den ceasefire deal tanabuba atema anir jembitsü asoshi Netanyahu-i Strategic Affairs Minister Ron Dermer shimogo, ta Mongulbarnü Israel nunger osang kar ajanga shia liasü. Taoba mapang jembishinüba nung Shin Bet tekolak Ronen Bar aser Mossad lenir Dedi Barnea nati anir jembia liasü.

Gaza ceasefire ya raksara tang tashi Gaza nung pua aliba Israel nunger tem yangjisa alitsü, aser Israel nunger lokti balala tali jashitsü.

ALI TAYOKTSÜ LIR

1. OLD SHOWUBA AREA KHEHOKHU VILLAGE @170 Per sqft.
2. NEAR FOOTHILL ROAD 4 MINUTES DRIVE FROM HIGHWAY.
@ 42 Per Sqft. (Any size available) Contact : 9863826159

Andreeva-i Dubai Open kokogo



Tsüklai/February 23, 2025 (Agencies):

Mirra Andreeva ya WTA 1000 title a ka abenba asayar tanutsütüla kümogo. Arishi küm 17 tain asayar yagi Dubai Open Tennis Championships koka liasü.

Final asaya nung Russia tsürla yagi 7-6 (7-1) 6-1 agi Clara Tauson koka liasü. Iba asaya akokba tetezü la taruba hopta rankings sayaba mapang tang mezüngbuba top 10-i aitsü.

Iba asayamung nung Andreeva-i final tonga asayaba mapang Grand Slam koker aliba asayar Marketa Vondrousova, Iga Swiatek aser Elena Rybakina nunger koka liasü.

"Ni taküm küm tatemibo

top 10-i aitsü nükjidong yur liasü," ta lai ashi.

"Tang February ita tatemerang lir aser ni nükjidong tongtetogo, anungji iba ya ni atema jangrademtsüka lir," ta laisa shisem.

Asaya nung arishi küm 22 tain Denmark tsür Tauson 2-0 tejakdang liasü, saka Andreeva-i serve ka break asüba den la indang serve merakzükdaktsüi 2-2 aküm.

Mezüngbuba set nung asayar ana tsüingda kasasa kanga toktepa asaya aser tiebreak asayatsüsa aküm, koba Andreeva-i koka liasü.

Tanabuba set nungbo Andreeva-i asaya amokbanger asaya aser la

yakta dang 5-1 agi tejakdang aküm aser world number 38 Tauson-i ball ka züktokba sülen Andreeva-i asaya koka liasü.

"Ni asayaba yimya dak kanga temulung süa liasü. Ni nervous süa liasü. Ni double faults menaba den aibelen kar menaba ajak nenoki ngur alitsü," ta Andreeva-i ashi.

"Ni pressure azüokteta asayatetba atema kanga pelar aser kanga jangradema bilemer," ta laisa shisem.

"Iba ya kü nükjidong liasü aser tang kü nükjidong atalokogo anungji tebang agi rasa ashitsü makoker," ta Andreeva-i ashi.

Japan-i Iran koka semifinals tongogo

Tsüklai/February 23, 2025 (Agencies): China nung tang asaya aliba AFC U20 Asian Cup quarter-final nung Japan aser Iran na asaya penalty metsütepba sülen Japan-i 4-3 agi asaya kokogo.

Shenzhen Youth Football Training Base Centre Stadium nung Deobarnü linük ana tsüingda asaya goal 1-1 nung tembangba sülen penalty metsütepba liasü.

Iba asaya akokba ajanga Japan semifinal-i aiba dang masü saka parnok FIFA U20 World Cup Chile 2025 nung asayatsü jangjaogo.

Iran-i asaya kanga junga tenzük aser parnoki Japan indang defense nongshia asaya liasü. Minute tasembuba nung Mahan Sadeghi-i goal idaktsütsü merandang ajisüaka pai metsüba ball tezüleni oadok.

Iba sülen Iran-i nongshia asayaba tajangzük ngua minute 5buba nung Reza Ghandipour-i goal ka idakja parnok goal 1-0 agi tejakdang aküm.

Goal achiba sülen Japan-ia asendenshir tajungba asaya tenzük aser minute 12buba nung with Aren Inoue-i ball tajung ka Soma Kanda nem agütsü saka Kanda-i metsüba

U20 AFC ASIAN CUP

ball ya Iran indang keeper Arsha Shakouri-i nokdanga liasü.

Goal idaktsütsü atema maneni nongshia asayaba sülen minute 30buba nung Kose Ogura-i metsüba ball ka Amirmohammad Razzaghini ka tsükdaker Shakouri adena goal ia score 1-1 aküm.

Asaya mezüngbuba shilem tembangtsü lia Japan-i tera agi dang goal midaktsü, saka

Inoue-i metsüba ball nokdang aser Rion Ichihara-i tongoktsüba ball bar adena ao.

Asaya tanabuba shilem nung Japan-i maneni Iran nongshia asaya saka keeper Shakouri-i kanga junga asaya ball aika nokdanga liasü. Minute 77buba nung Iran-i goal idaktsütsü atema maongka angu saka Razzaghini-i metsüba ball bar adena ao.

Goal kaka dang agütsüba sülen mapang apuloktsür asaya saka team kati danga goal midaktsütet. Penalty metsütepba mapang Iran-i mezüngbuba shot ana midaktsütet aser Shakouri-i Japan indang tasembuba penalty nokdangaka Rion Ichihara-i süngjemshir goal idakja Japan-i asaya koka liasü.

West Ham-i Arsenal akok

Tsüklai/February 23, 2025 (Agencies): Mimlai lia West Ham-i Arsenal goal 1-0 agi akokba sülen Arsenal pur Premier League akoktsü timla aliba nung tetsükdaktsü adokdaktsüogo. Kasa mapang nung Manchester United aser Everton nata Honibarnü goal 2-2 agütsür asaya tembanga liasü.

Emirates Stadium nung asaya koka title atema toktepba mapang temaba jenjang nung aliba Liverpool team den tawa aliba tajemba kümdaktsütsü maongka liasü.

Ajisüaka Jarrod Bowen-i West Ham atema asaya mezüngbuba shilem nung goal ka idaktsüba sülen parnoki asaya akok. Mikel Arteta-i aniba team ya league asaya 16buba nung tang mezüngbuba tamakok nguogo.

Asaya nung ano Mohammed Kudus alangdaktsüba atema Arsenal nungi asayar Lewis-Skelly nem red card ka agütsü aser iba ajanga ano parnok tali timtema liasü.

Honibarnü Goodison Park nung tanga asaya ka nung

Everton nungi asayar Beto aser Abdoulaye Doucoure nati minute 33 tsüingda goal ana idakja parnok tejakdang aküm.

Ajisüaka asaya atemtsü minute 18 anunga lia Fernandes-i free kick ka ajanga United atema goal ka idaktsü aser iba sülen Manuel Ugarte-i tanabuba goal idakja asaya kasasa nung tembanga liasü.

Mapang apuloktsür asayaba mapang Everton nem penalty ka agütsü, saka referee Andy Madley-i VAR asadangba sülen iba penalty ya magi kümdakja liasü.

Maneni Tottenham-i goal 4-1 agi Ipswich kokogo.

Asaya nung mezüngbuba goal ya Brennan Johnson-i idaktsü aser iba sülen minute ti dang lir ano Johnson-isa tanabuba goal idakja liasü.

Asaya nung Ipswich atema goal ka ya Omari Hutchinson-i minute 36buba nung idaktsü.

Maneni asaya nung Tottenham atema Dejan Kulusevski aser Djed Spence nati goal kaka idakja parnoki asaya ayong ayonga koka liasü.

Van Persie head coach kümogo

Tsüklai/February 23, 2025 (Agencies): Taoba mapang Manchester United nungi asayar Robin Van Persie, Feyenoord indang head coach asütsü Deobarnü shimogo. Dutch nunger nüngtugu asayar yagi pa lanuwa asayaba club den 2027 küm tashi atema tenangzüktepba ka yangluogo.

"Ni Feyenoord den koda tesendaktep tajung ali aji ajaki meteta lir. Ni staff tajungtem den 1908 aser iba sülen De Kuip nung Legion temi teyari agüja inyaktsü, asayatem asayatsü aser külemi takok nguyonga aotsü yongya atar," ta Van Persie-i ashi.

Van Persie asaya aliba mapang 2004 küm nungi 2012 tashi Arsenal nungi asaya aser iba sülen Manchester United nung oa asaya, kong pai Premier League koka liasü.

Van Persie ya goal kanga junga idaktsütetba aser

masüba ka nungi maongka yanglua goal idaktsüba atema kanga nüngtugu liasü. Pa ya sharpshooter ka liasü aser pai opposition defensive nem aiben timtem agüja liasü.

Pai 2012-13 season nung Sir Alex Ferguson lenisüba nung tatemsa PL akokba nung tongtimbang asayar ka liasü.

Van Persie ya 2024 küm nungi Heerenveen indang coach mapa bener aruogo aser tang pai Feyenoord coach mapa agizükogo.

Van Persie atema mezüngbuba coach mapaji Feyenoord indang Varkenoord Academy nung inyak, kong pa U-18 team indang speciality coach liasü.

Rene Hake shiba FC Twente, FC Utrecht aser FC Emmen nunger amala club balala nung inyakogo, pa Feyenoord nung assistant coach ama denogo aser pai Van Persie nem teyari agütsütsü.

BILEMDANGANG

"Shisabulu khuret agi shinga mebandanger."